

lere, compliti per meterle a lo scaro, tene suo camino verso ditto loco; e una matina, al far del zorno, se presentò de li con la proa in terra, et con artelarie comenzò a batere la gente, quelli vardavano, che erano cavalli 400, pedoni turchi 200, albanesi et grechi del paese 400. E perchè l'artilaria fazeva de l'horo carnazo, fureno constreti abandonar el loco, et quelli de le gallere desmontorono in terra et meseno focho; el qualle, per lo vento era prospero, fu sì veloze, che, im brevissimo spazio, tutti li brusò, et non dè tempo a quelli de le galere recuperare, per l'horo uso, oltra 200. Ditto capetanio scrive, haveere saputo da uno greco, prese in quello loco, che erano remi zercha nuove milia, ch'è cossa donarà tardanza et disturbo a l'armada turchescha per mare, quale Dio sconfondà, perchè tali remi erano deputadi a quella, et im brevi jorni dovevano esser conduti. *Item*, ditto capetanio ha mandato qua una parandaria grossa turchescha de fruti, sopra la qual sono venuti homeni 18, quali se trovava in le galie e in terra, quando fo fato ditto incendio, et haver preso do fuste de la palatia. De questo havemò voluto dar avviso a vostre excellentie, parte perchè è cossa degna de noticia, et parte perchè cussi ricerca la nostra amicitia. *Valeant felices vestra excellentie.*

*Data Rhodi, die supra scripto.*

*Da Corfù, di sier Luca Querini, provedador, di 16 zugno.* Prima, dice zercha Coltrim, vol se li mandì danari; scrive si va fortificando. *Item*, per un'altra letera dil ditto, che Piero Pissina, Piero Grimaldo et Paulo Albanese, contestabeli, voleno danari; e li fanti di Paulo usano parole grande: lui à dato ducati uno per uno, acciò non vadino in Turchia. *Item*, uno caporal di Piero Grimaldo, nominato Lodovico Brazoduro, con compagni 14, con uno gripo, se ne andò verso la Puia. *Item*, dimanda si paga li maestri bombardieri etc.

*Dil ditto, di 18.* Le cosse di l'armata son quasi ultimate, zoè dil turcho; quella dil colfo di Patras è reduta tutta a Lepanto, e de brieve dia ussir, quella di la Prevesa, la più parte è in hordine, za tre galie è in aqua, come ha dal castelan di la Parga, et erano ussite in mar, e poi tornà dentro. A la Valona è in aqua galie 20, et per zornata si va butando, e asapi e janizari in gran numero.

170 *Item*, il nostro zeneral à mandà le galie grosse e sotil a Vischardo, se li patroni si porterano ben, e si l'armada fusse unida in la bocha di Cuzolari verso il colfo di Patras, non sa quanto la inimicha po-

tesse ussir. *Item*, di lo exercito 0 si ha con certeza; si dice va a Napoli, Coron e Modon; di Corfù non teme, et si stagi di bon animo.

*Di sier Piero Liom, baylo, e consieri di Corfù, data a di 17.* Come capitò de li do corvati, presi quando turchi feno la taiata in Crovatia, stati schiavi zorni 12, fuziti di la Prevesa, dove è stati mexi 8 a segar legnami. Dice esser gità in aqua galie 26, zoè X grosse, il resto sotil; qual par galeote da 20 fin 24 banchi; et le grosse, come le nostre sotil; e sono condute al Vati, dove è turchi a custodia. Per dubito hanno posto su le ponte dil porte (*sic*) bombarde do di riparo in terra. A la Prevesa è galeote 8, *ut supra*, tute serade, e si lavora di chalafao. È venuto comandamento dil signor, soto pena di esser impaladi, li maestri debino compirle per tuto il mexe presente; ma l'horo judicano non potrano; et è apariadi legnami per far 4 fuste, li arbori sono taiati in uno bosco contiguo, chiamato Rogos, lontano una zorna' de li; li conduce zoso per uno fiume, chiamato Cranar; e li è stà conduti per terra su le spale remi X milia; le velle se cuseno a la Janina, dove hanno fostagni assai; le sartie se fazeva a la Prevesa, le gomene e li ferri è portati per terra da Lepanto a l'Arta; e za li ferri son portati a la Prevesa; sono asapi 8000, janizari 500, christiani 2000 angarizati, tutti serviani, per montar suso ditta armada. L'arma' di Lepanto si dicea dovea venir in bocha di colfo di l'Arta, per unirse con questa di la Prevesa, e poi andar a Modon e Napoli. L'armata de Styri è tutta in hordine; aspeta *solum* questa, e subito ussirà; non sa la quantità. Il signor si dice è in le contrade de Lariso con il bilarbei di la Romania, per intrar in la Morea, ma non intrerà se prima l'armata non è tutta in hordine. El bilarbei di la Natalia è a Semendria con 20 milia persone, per dubito di hongari, e si dice la Signoria à mandà danari a l'hongaro, che 'l rompa; *tamen* ungari non sono mossi.

*Item*, a la Valona, per uno ozi vien di la Zimera, dice è bon numero di turchi, pedoni e chavali, e le galie nostre hanno butà in bocha di la fiumara saxi per impedir l'ussir di quelle galie, e turchi, vol trazerle per uno altro locho, à preparato gran numero de palange, vol tirar le galie, e a marina à fato uno riparo. *Item*, li a Corfù esso rezimento atendono a le fabriche; dice il fuzir di do caporali con 16 compagni etc. *Item*, è stà ruinà parte dil palazo; è stà fato ne la costiera, soto el grebano dil Castel Vechio, uno riparo dove è stà poste quatro passavolante discopre per tutto; è stà abassada la torre dove stanza el consier di la Zudecha, e l'altra torre, dove